

四庫全書

集部

欽定四庫全書

石倉歷代詩選卷一百九十七

明 曹學佺 編

宋詩七十四

張九成

山中見柿樹有感

茲山余初來掩冉柿葉青
相去未三月柿花亦已零
及茲尋去路纍纍滿空庭
人生豈無情眷眷不忍行
嚴霜

八九月百草不復榮惟君粲丹實獨掛秋空明寄語看
園翁勿使墮秋風願比櫻桃春置之大明宮

魯直上東坡古風坡和之因次其韻

幽蘭如君子閒雅翰墨場春風曉畦暖斜日半窗光竟
夕澹相對菲菲吐暗香掩關清杖屨簾卷度脩廊釵玉
莖分紫官梅花更黃豈惟堪紉佩試伴菊英嘗退處深
林好休移庭戶傍自同凡草茂無事莫相傷

正月二十日出城

春風驅我出騎馬到江頭出門日已暮獨行無獻酬江
山多景物春色滿汀洲隔岸花繞屋斜陽明戍樓人家
漸成聚炊煙天際浮日落霧亦起羣山定在不江柳故
撩人縈帽不肯休風流迺如此一笑忘百憂隨行亦有
酒無地可遲留聊寫我心耳長歌思悠悠

二十六日復出城

杜門不肯出既出不忍歸借問胡為爾江山樓落暉濯
濯漱寒玉青青入煙霏柳色明沙岸花枝作四圍玉塔

天外小漁舟雲際微興遠俗情斷心閒人事稀我本江湖人誤落市朝機計拙物多忤身臞道則肥所以此勝概一見不我違吟餘尚多思白馬背人飛

十二日出城見隔江茅舍可愛

茅屋臨江上四面惟柴荆綠陰繞籬落窗几一以明門前灘水急日與白鷗盟不知何隱士居此復何營朝來四山碧晚際沙鳥鳴暮聲度竹靜江深琴調清終携一樽酒造門相對傾心期羲皇上安用知姓名

食苦笋

吾鄉苦笋佳出處惟石屋玉肌膩新酥黃衣緣深綠林
深恐人知頭角互伸縮煙雨養春姿此物未成熟三月
臘酒香開樽慰幽獨烹庖入盤俎點醬真味足未須五
鼎牛聊稱一囊粟竭來庾嶺下歲月去何速經冬又七
春未分窮途哭今朝好事者惠我生一束頭髭甲爛斑
味惡韻麤俗兒童不慣嘗噦噫驚媼僕老妻念鄉味放
箸淚盈目丈夫志有在何事校口腹呼奴更傾酒一笑

風生谷

有客

春雨止復作閉門無與居童奴告余言有客叩吾廬東
帶出見之頽然一丈夫手携一樽酒辭氣何晏如謂言
久聞名曾未瞻簪裾天寒宜飲酒一杯聊以娛盤飧亦
草草蔬果間溪魚顏色溫勝玉言談貫如珠豈期有道
者而來警我愚酒酣意兩適心閒樂有餘四海元有人
君勿輕荒區

菖蒲

石盆養寒翠六月如三冬勿云數寸碧意若干丈松勁
節凌孤竹虬根蟠老龍傲霜滋正氣泣露泣春容座有
江湖趣眼無塵土蹤終朝澹相對澆我磊砢胸

三月晦到大庾

我登超然臺積雨久不止臺下柳成行掩映盈塘水環
塘率喬木倒影弄清泚恍如在故鄉西湖幽寺裏氣象
極幽深景物盡蒼翠十年勞夢想一夕居眼底獨坐不

能去頽然起深思鐘鳴主人歸燭光何燁燁笑語復移
時夜久余當起歸路夫何如江聲寒玉碎

九月七夜喜新涼

晚來天宇陰便有如許涼衣襟不作苦燈火耿寒光青
編如故人入眼興未央憶昔炎歊日蒸鬱如揚湯百事
懶不支何暇攷短長念此深自喜拂窗淨琴張老來縱
眊昏閉目自焚香心清神亦正聖賢儼在傍此意勿輕
語此景吾弗忘

十一月忽見雪片居此七年未嘗有也

寒色遽如許神清瘦不禁瓦溝聲磔索珠琲亂衣襟斯
須忽復變玉屑墮前林風勁勢回旋飄飄蔽遙岑落此
炎瘴地七年到于今不見六花飛况聞寒玉音今年盈
尺瑞天以慰吾心呼兒具盃盤開樽須滿斟更製白雪
辭入我綠綺琴

庚午正月七夜自詠

余性寡所諧平生惟自得談名頸深縮論利面作赤文

不貴雕蟲詩尤惡鈎摘麤豪真所畏機巧非余匹所以
常閉門千載求知識黃卷有可人為之忘寢食亦復愛
山水策杖無與適看雲獨忘歸聽泉常永日內樂萬事
休中虛衆妙入欲以語斯人此事吾無力道喪亦久矣
無言三歎息

課書二首

汲汲我何事愛此窗日光北門終日開風透軒檻涼貧
病何以療六經真古方榮辱頓爾失太山亦毫芒呼兒

來讀書絃誦驚滿堂仕途有捷徑掩口笑我狂

橫浦非吾土久寓亦何聊不學竹林友把酒持蟹螯飢
寒何用遣惟以文字消方其得意處摔茹亦逍遙頓忘
物我情天地本寬饒告爾二三子我歌汝其謠

罷祿

嗟余命偏奇一生墮枯槁雖無青精飯顏色亦自好富
貴點汙人脩潔終可保居處既悠悠衣食亦草草靜觀
天寶間脂澤逞淫姣冰山赫日來隨例須崩倒所得無

纖毫所喪不到老施施若無事憂心起如擣

偶成

冒熱不安寢整冠常夙興清風入我懷眷眷如有情嗟
彼朝市人正與膏火爭藏機入鈎鈐肆辯紛縱橫所得
無幾何所嗟無一成往來各有趣南北自分明明德天
所相欺誣禍所嬰猶如赴火蛾纏綿尚營營悟此澹無
作不與炎涼并居閒苦無事驅馬出南城登山猿不避
鼓棹鷗靡驚誰知瘴嵐中談笑適此生祥鳳非矯矯高

鴻本冥冥請君少安坐此詩殊可聽

送鄭仲遠

仲遠英俊人落筆驚飛電來自神仙中風姿冰雪盪我
謫天南陸君來適相見憶昔我與君射策麒麟殿君時
氣橫秋九萬搏風便文辭灑星斗議論倒江漢便宜上
玉堂不爾登蓬館別來二十年青衫尚州縣蘭薰麝所
忌玉潔女多怨嗟我正衰遲何階往論薦豈有如此人
而得長貧賤朝廷方急賢珠璧聯清貫去去行勿遲九

天春晝暖

辛未閏四月即事

閒居喜無事冠櫛每晨興今朝鳩喚夢疑是天雨徵萬
事雖顛沛此非常可憑須臾倒江湖一掃蠶瘴腥雨罷
有何好環江數峯青蛟龍得時橫長堤豁然崩衰老甘
寢寐半夜聞雷聲連岡萬株松漂零一毛輕雨意疑未
已浮浮晚雲蒸咄哉造化兒徒勞竟何成

其二

窮居不擇交賢否那復辨似人輒已喜况復曾半面相
見且寒溫不問風雨變晚來無與遊澄江喜如練携筇
信步行屈曲隨山轉數日雨不止衝波頽激箭舊雨已
不來今雨誰復見甕頭香滿屋吾計今已辦豈復思故
鄉無事且彊飯

其三

種槿已五載入門幽逕深拒霜偶然植亦解成清陰晚
涼新浴罷松風披我襟終日岸巾坐閒無人見尋浩然

媚幽獨發興付瑤琴

其四

寓居城中寺蕭然如深山終年客不到終日門亦闕晨
朝香火罷去履脫危冠飽讀古人書會意有餘歡客有
饋荔枝薦以碧玉盤吟哦更咀嚼未羨朱雨輻絞綃作
紅皺護此冰肌寒

其五

橫浦亦何好人煙眇荒墟所以常閉門九年惟讀書余

幼好奇服玉佩而瓊琚念徃復推來薰然樂有餘客有
不知者笑我長勤渠目昏心則瑩道腴形自枯千載陶
淵明簞瓢常晏如譬彼雞羣中有此海鶴孤

擬古

昔我竄橫浦佳致未易陳偶經竄頭宿谿山妙入神煙
波橫小艇疑是古玄真誓言或生還孤志良一申別來
已十載念此渴生塵何當攜我輩徑徃莫問津謹勿思
高官驚憂可悲辛

又

平生澹無營生計亦草草吾廬儘有餘懶問長安道楚
澤驚屈平書空咤殷浩願君且休矣沈憂令人老

又

余生本無用頽然落澗阿飢食山頂薇寒編松上蘿豈
敢怨明時貧賤固其宜原憲樂窮巷屈平愁深陂度量
何相越道在胡速遲屈子則已矣原子有餘輝

又

願隨春陽和不隨秋草萎
光陰瞬息耳憂悲亦何為
蘭蕙生深林時有朝露滋
清香隨春風邈若有所思
我亦慕明德杖藜往從之
林深不可見相過終有時

又

蕭騷老蠶婦窈窕深閨女
閨女曳羅裳老婦勤機杼
夜深燈火微那復淒寒雨
辛勤貢王宮棄擲乃如許
一縷不著身含愁誰敢語

又

促裝何噓噓西笑都門道出門何所見王孫媚春草綠
鬢仍朱顏未信人間老去去謹勿遲功名苦不早

又

山色翠接藍盃中酒如玉飲酒彈瑤琴漫奏流水曲音
微澹無味絃緩軫不促不須苦求知古人有遺躅推琴
一長嘯清風振吾屋

又

喬松列萬行知是誰人墓龜趺表山岡石馬夾山路潺

潺湲水秋蕭蕭白楊暮蒼黃愁殺人何物能超寤人命
極危脆不殊花上露秦皇死則已規與山河固一朝禍
機發所掘無尺度想見冥漠中自歎平生誤遺臭千萬
年至今汙尺素

又

少小有高志思與古人親二十學文史三十窮典墳坐
觀世間事抱火屑積薪此心雖炯然不敢以告人君門
深九重欲陳諒何因

嘉祐寺

曳屣出南郭招提在高岡誰言林樾中乃有此寶坊甘
泉溢中庭脩桂廡層廊三秋此花開清香駐高堂試問
紅塵中那得六月涼門外江聲濶堂中松韻長古殿儼
像設佛燈龕夜光不見堂中人斗覺心悲傷人生本無
定樂處是吾鄉吟餘復何事月落山蒼蒼

秋興

秋意入茅屋杖策登平原落日銜西山一川頓明鮮瀟

瀟江竹溜溜巖下泉我生本閒放胡為此拘拳身世兩
相違于今六十年勇退未為怯銳進豈其賢

其二

月落在樓角驚鳥連夜啼門前蟬噪急牀下蛩亦悲豈
不念節物清霜殞華姿況我有鵠原九年此生離時亦
詠歸去緬然久無期為善天所相何以報吾施大明生
于東皎月生于西茲理儻不昧胡為浪嗟咨

多雨偶成

謫居天南陲終年寡儔侶四月山氣行淋漓滿城雨獨
坐北窗下蕭然無一語睡起復何如雞鳴已亭午

七月十二日偶成二首

今夕起鄉心何日歸漁釣欲歸定何所無言獨長嘯君
意復何如雅俗不同調此生吾自斷天道自難料
塘南蓮吐錦塘北樹成幄夜來已秋風朝見一葉落呼
酒玩餘景行見紛索索人生如寄耳何苦不行樂

桂

清香不復聞雪英驚滿地尚餘青青葉濃陰猶可庇我
欲營茅屋示此惜花意茲謀未易言俗士寡清致

擬歸田園二首

所居極幽深事簡人迹稀乘興或登山興盡輒復歸芝
朮足吾糧薜蘿富吾衣一生澹無營百事不我違

不必効沮溺聊與世相娛荒山無隣里人煙在村墟所
以近城市幽處卜吾居門前草三徑堂下柳五株雖無
羊酪羹簞瓢亦晏如在我儻知足清貧樂有餘

遊南路菩提寺次刁文叔韻

高僧居物外有戶畫常扃海近知天濶泉甘識地靈一
簾春月靜數點列山青便卜歸歟計移文漫勒銘

雙秀峯

且向城西去休驚雨濺空亂山明滅外古剎有無中笑
指雙峰翠迴看落日紅中興喜無事歌管莫匆匆

過報恩

籃輿訪蕭寺煙暝漲春空遠樹樓頭綠殘霞山外紅昏

鐘發林杪人語殷橋東回首都無迹浮生真夢中

雨

已止還復作瀉簷聲更長苔錢添晚翠梅子試新黃屋裏圖書潤庭前蘭芷香倚欄閒覓句水閣夜生涼

三月晦城門晚景

雨漲春江浪沄沄日夜奔羣山落雲裏萬壑吼巖根沙際人呼渡煙中牧入村蕭然何處士終日掩柴門

到白石寺次壁間鄭如圭韻

寺古僧多老雲深水自流鳥聲驚客夢山色到江樓落
日千林迥清風一逕幽幽懷終未已歸去輒回頭

二月二十四即事

春來尋勝事此興亦何窮夜雨亂江綠朝花褪日紅雷
聲驚嶺北雲氣漲溪東簑笠衝泥者誰知與我同

三月十一日不出

老罷慵人事柴門盡日扃春江入幽想夜雨漲前汀何
日當晴霽西山正眇冥江頭無限好見說柳深青

即事

幽事晚山色幽齋春雨餘
亂紅歌澗水浮綠漲郊墟
牖迸新笋西園生野蔬
槿籬繞茅屋已分老樵漁

雨晴到江上

今朝山色好不似未晴時
路轉沙汀出橋回櫂柳移衆
山來衮衮積水去披披雲葉多
奇態巔花弄晚姿人家
機杼急野寺鼓鐘遲
欲去不得去冥搜足此詩

十二月二十四夜賦梅花

我來嶺下已七年梅花日日關清妍詩才有限思無盡
空把花枝歎晚煙頗怪此花嵐瘴裏獨抱高潔何娟娟
香如靈均佩蘭芷遠如元亮當醉眠真香秀色看不足
雪花冰霰相後先平生明明復皦皦一嗅霜蘂知其天
固安冷落甘蠻蜚不務輕舉巢神仙他年若許中原去
携汝同住西湖邊更尋和靖廟何許相與澹泊春風前
見菊花呈諸名勝

勿謂重陽把一枝嗟余何限古人思靈均自著離騷日

元亮長歌歸去時未曉只疑猶泣露開門忽見滿疎籬
要呼四海平生友來醉花前金屈卮

出城

不出柴門近兩旬江邊柳眼已窺人却思歸去西湖上
剝把長條醉幾春

元夕

前年元夕沸香塵萬朵紅燈上早春誰謂今宵頓寥落
長天獨擁一冰輪

夏日即事

萱草榴花照眼明
楸枰水閣晚風清
蕭然終日無人到
簾外時聞下子聲

又

陰陰庭院靜無聲
只有黃鸝遶樹鳴
午睡覺來何所見
玉爐風細碧煙橫

惜花

數日生寒緊杜門
今朝步履到前村
可憐桃李都飛盡


細雨斜風更斷魂

二月八日偶成

今年春色可勝嗟
二月山中未見花
長憶去年今夜月
海棠花影到窗紗

題郡齋壁

吏散兵休文案靜
數竿脩竹隔疎簾
嗟余老矣欲歸去
肯對江山歎滯淹



石倉歷代詩選卷一百九十七

欽定四庫全書

集部

石倉歷代詩選卷一百九十八至二百

詳校官庶吉士臣范逢恩

侍讀臣孫球覆勘

總校官進士臣朱 鈐

校對官中書臣葉 蘭

謄錄監生臣汪兆鼎

欽定四庫全書

石倉歷代詩選卷一百九十八

明 曹學佺 編

宋詩七十五

宋伯仁

歲旦

居閒無賀客早起但如常
桃板隨人換梅花隔歲香
春風回笑語雲氣卜豐穰
栢酒何勞勸心康壽自長

久雨

暗數春來雨曾無兩日晴
樹連山莫辨橋與水俱平
閉戶惟應懶逢人且問耕
海棠花落盡顚顚幾流鶯

雪後

暖地難為雪春天易得晴
落梅狂客意啼鳥故園聲
愁樂從他事湖山寄此生
願將身與世一葉等相輕

悶甚

餘醺開已殘窗戶尚輕寒
往事多因拙清尊強自寬
對

妻憐病久顧影得心酸更展淵明集從頭一再看

妙智庵

結屋古山巔源流未有年便非真隱者且喜得安然石
洞雲同卧茶鐺客對煎我來當小憩詩滿夕陽天

蘇州有感

秋意滿姑蘇扁舟憶五湖鈴聲邊報急帆影客心孤野
港青如染遙山淡欲無千年遺跡在過眼只斯須

曹娥謝趙菊莊相訪

江程潮汎小沙磧纜行舟挈酒尋詩好披心話客愁雲
歸山欲暝風急雨如秋可惜相逢處匆匆不少留

再會夏石芝

自與君相別駸駸已數年一檝書不寄千里夢徒然雨
店花新長風櫺月幾圓嶺梅無恙否愁滿鬢絲邊

雨中

終日翻盆雨池亭晚更涼對琴思古意釀酒惜韶光綠
漲便鷗懶殘花笑蝶忙高田皆可挿好與報君王

答林巡簡惠詩

客久情懷惡逢人懶說詩不堪秋到後將近雁來時歌
枕皆歸夢同心只舊知淵明籬下菊誰伴傲霜枝

春半

春到已多時遊人替衲衣柳眠鶯喚醒花瘦雨添肥官
事癡能了人情久易非一貧能自守贏得掩柴扉

漁父吟

小舟如雁驚穩穩下波心簑笠幾風雨江山無古今清

歌鳴短棹紅葉滿疎林一醉不知世前村月未沈

值雨

吳陵雨月雨留連來問瓊花落砌邊市酒未銷狂客恨
塞鴻先作嫩寒天只憂松下無三逕不管囊中欠一錢
楊子江頭風正急未知何日買歸船

寄舊友

男兒未遇總英雄漂飯非憐計已窮鮑叔但能知管仲
孔明猶必拜龐公秋江萍梗人何處夜月梅花夢亦同

借問選詩編幾許元暉蕭散漸唐風

題象山縣棲霞觀應真亭簡住持張羽士

杜鵑聲裏立東風山色應憐鬢已蓬
二麥曉寒新雨後
一年春事落花中
醉斟浮蟻邀仙客
笑揖飛鷗問釣翁
簷外萬竿君子竹
虛心能得幾人同

村莊即事

青旗獵獵又村莊
仙景還他是故鄉
叟有七旬頭未白
山無重數葉初黃
稻畦明月家家酒
茆屋清歌處處霜

晚菊一籬秋欲老客懷牢落愧重陽

登海陵城

淮楚年年一番秋西風慣識古譙樓
金湯城壁休清野玉帳英雄未白頭
霜草萬家人冷落凍雲千疊雁綢繆
中原無計堪脩整且對屯兵說近愁

別朱冷官

客中奔走易蹉跎學館癡留月又過
橙蟹醉斟知已重蓴鱸鄉話益人多
吳陵今夜三更月雲水明朝一棹歌

船在白蘋亭下過有無傳語曬漁簑

出陸

吳陵咫尺是維揚
徒步方知去路長
漁屋試霜蘆葉老
酒家留客豆花香
秋光淺淡人同瘦
雁影參差我共忙
僕子莫嗟行李重
擔頭強半舊詩囊

瓜州阻風

狂風未許放歸船
借得僧房半榻眠
落雁影收帆腳外
怒濤聲到枕頭邊
黃花葉底秋將老
白羽書中病未痊

傳語將軍多着力揚州不比舊家年

焦山簡主僧無庵

輕搖風櫓過焦山山色相留半日閒
萬頃月波秋雨後一篝煙翠夕陽閒
城依鐵甕心猶壯酒對金峯鬢已斑
願得淮西來好語吸江亭下且怡顏

邊頭老馬

解下韁繩便欲眠絕無筋力可勝鞭
霜蹄遍識淮南地夜草猶吞塞北煙
怕逐綵旗排偃月寧思金鉞趁朝天

華山自有安身處試問將軍在幾年

夜過烏鎮

望極模糊古樹林彎彎溪港似難尋
荻蘆花重霜初下桑柘陰移月末沈
恨別情懷雖戀酒送衣時節怕聞砧
夜行船上山歌意說盡還家一片心

簡張寄翁秀才

徽外琴聲局外棋此心能得幾人知
縱橫謾說三十字陶寫須吟百一詩
秋到蓼花蟬噪後雨敲荷葉釣歸時

西湖儘着張公子莫把吟蓬月共移

呈菊坡先生陳樞使

但知猿鶴伴閒居不覺憂時鬢已疎對客怕言今日事
挑燈重讀少年書樓迎山色詩堪畫門對梅花月共鋤
相業累興明主意先生只恐自躊躇

賀鶴林吳尚書赴召隆興

驚翔芝簡下溪堂醉夢驚回午正涼寵報帝俞催宰相
宣將州綬召文昌蘋花襟袖宮花近詩草簾櫳諫草香

大化一新多吉士卷阿歷歷告成王

苦風督鹺課甚迫

僕僕馳驅夢不安猥哉誰恤買鹺官星臺閣住春來俸
雨意翻成夜半寒人可與言能幾輩事難區處更多般
桃花一日都開盡插滿銅瓶亦倦看

秋雨簡劉主簿

秋到天涯未雨旬西風無日不霖霖數行新雁千門曉
十幅輕帆萬里心薄宦只宜聞早去長淮未許作狂吟

江南誰倚闌干曲丹桂香中酒自斟

寓西馬塢

十畝荒林屋數間門通小艇水灣灣
人行遠路多嫌僻我得安居却稱閒
樽酒相忘霜後菊一時難盡雨中山
何年脫下浮名事只與田翁賸往還

呈留耕先生王侍郎

夜雨篝燈夢未閒十年殊愧屋頭山
喜聞鐺脚濤聲起不憚吟髭雪樣斑
漁釣醉歌人所願功名心事國相關

辟書笑倒梅邊鶴盡在先生指顧間

寄題臨江王實齋司戶百花洲

錦囊詩句識花洲何日清江得醉遊
百畝故園重關飭四賢遺像愈風流
香浮紅樹春應早雪壓寒梅月想留
我有煙波魚具了一絲風底願維舟

夜坐

栢香煙裏瀾山茶窮似燒丹道士家
窗紙暫明寒月上
一肱清夢入梅花

秋田小立

兩間茆屋是誰家
淺水汀洲舞荻花
牧笛數聲紅日晚
自慚身是客天涯

兀坐

對坐清清一穗香
悄無人語日偏長
硯盤數點梅花片
暗引遊蜂度粉牆

晚涼

雨雨蟬聲送夕陽
竹陰移綠上藤牀
黃昏急雨無多子

喜得今宵夢亦涼

湖上

一泓寒玉浸青山
粧點樓臺夕照間
歌管滿船春未懶
惜無人伴白鷗閒

西湖晚歸

一輪紅日倚青山
只見湖光數里間
聽得畫船人說道
錢塘門到夜深關

紙鷁

弄假如真舞碧空吹噓全在一絲風惟慚尺五天將近
猶在兒童掌握中

晚春二首

風殘殘花滿地紅別離樽俎謾匆匆春光未肯純收去
却在荼蘼細影中

綠陰陰裏惜韶華自縛筠梢掃落花可笑遊人心未懶
杜鵑啼處撥琵琶

戲作

青梅黃盡雨無多
柳影重重午日過
忽聽隔籬人語笑
採蓮船子上新河

倦吟

競病推敲欲嘔心
何如危坐拆桐陰
新蟬咽咽知人意
學我年來抱膝吟

愁

愁懷難畫亦難詩
惟有流鶯暗得知
我忽無言鶯不語
柳邊相看立多時

夏日二首

泓泓圓碧漾新荷獵獵斜風顫綠莎農事正忙三月後
野田齊唱插秧歌

數點沙鷗掠野塘雨聲初歇水微茫橋邊十里荷花蕩
輸與漁人卧晚涼

羊角埂晚行

葛裙蒲履帽烏紗迤邐乘涼到水涯數寺晚聲鐘未歇
滿身明月看荷花

瓊花

莫訝重栽聚八仙
幾經邊警亦堪憐
珠簾十里春狼籍
且把天香作舊年

寓目

暖風輕撥繡簾開
放入雙雙紫燕來
燕子似于人有舊
細銜花片落粧臺

村

又是江南割稻天
家家兒女笑相牽
芙蓉占斷清溪水

獨許漁人醉艤船

有感

窗戶清清半掩門
小兒揩淚立黃昏
幾多心事無人問
獨看梅花半月痕

蓼花

秋到梧桐我未疑
蓼花何事已先知
朝來數點西風雨
喜見深紅四五枝

涼

不擬西風一頓涼
看看涼近木樨香
人家未得征夫信
早有砧聲怯雁行

落葉

卷地西風促雨來
掃除黃葉滿蒼苔
垂楊早有青青眼
只礙梅花未敢開

石倉歷代詩選卷一百九十八

欽定四庫全書

石倉歷代詩選卷一百九十九

明 曹學佺 編

宋詩七十六

王庭珪

夜歸西園獨步

清夜遊西園竹影亂秋月穹色湛虛明林光益奇絕人
間睡方濃那知此時節坐觀衡陽移領列風煙別沆瀣

洗天宇一飲醒毛髮氣與南山高青蒼助施設池塘收
綠淨星斗轉空濶微雲點太清須臾亦自滅明朝問此
境勝處不可說却恐雞三號開門走車轍

遊貢游洞

竄身楚西極幽竒頗窮歷況此古道傍橫天竦蒼壁何
年始開鑿工如鬼鏡刻飛空數百丈突出清鯨額那知
風雨時雲雷非窟宅事跡墮渺茫探討失圖籍豈無高
世士于此煉金液不能久徘徊上馬空歎息

江亭侯施倅醇翁阻水漲作詩寄之

夜雨漲溪碧天明望歸舟飛帆出木杪浩蕩兀中流洪
崖仙人姿謂落滄海遊興盡却回棹待此霖潦收抱琴
出竹迎倒披翠雲裘風濤正可久煙波生暮愁

送謝夢叟昆仲之湘江

蠟屐訪窮巷脂車戴曉星哦詩添些語望岳插清冥烽
火連蠻徼樓船壯洞庭瀟湘多夜雨羨爾對牀聽

送客

東門楊柳陌車騎散林垆草綠古今道馬嘶長短亭人
歸天北闕使動斗南星送客何年了春嶺又滿汀

春日遊鵲湖山

風起羣木末花開雨壁香山深雲影變人靜鳥聲長紺
殿橫崖起飛泉噴玉光扣門僧出定彈指下禪牀

送劉禹錫之官五羊

南海千山外東風幾驛催嶺頭梅雨歇旗尾瘴煙開蠻
徼無塵起中原有使來時應問消息會向日邊回

郭教授南窗置酒觀競渡次坐客劉時舉韻

一飲徑一石此風誰敢陪日移林影轉船劈浪紋開銀
燭自相映玉山何用推廣文官獨冷賴此酒盈杯

題宣和御畫

玉鎖宮扉三十六誰識連昌滿宮竹內苑寒梅欲放春
龍池水暖鴛鴦浴宣和殿後新雨晴兩鵲飛來向東鳴
當時妙手貌不成君王筆下春風生長安老人眼曾見
萬歲山頭翠華轉恨臣不及宣政初痛哭天涯觀畫圖

仙人春宴曲

高樓玉珮搖春風銀槽壓雨珍珠紅天留曉月十分魄
飛光下照仙人宮瑤姬半醉搗鼉鼓綵鳳吹笙黃鶴舞
雙成翠袖織藕絲麻姑行厨擗麟脯金盤燒蠟夜未央
從妃進果蟠桃香坐上花開人未老他日重來花更好
三千年後忽相逢再約羣仙醉蓬島

觀駱元直經進江南形勢圖

異時漢網疎天討胡兒馬啣江南草石頭重戍豈無兵

將軍不識丹陽道至今戰骨埋秋霜傷心不忍問耆老
龍蟠虎踞昔何雄赤壁濡須在眼中潯陽江水射蛟處
旌旗拂天來向東艤艫塞川不敢下昔人曾此破曹公
橫江九道波翻屋試請輕兵渡淮曲夜入長安人不知
應見畫圖心已熟他日將軍按此圖鼓行而西如破竹

和劉美中尚書聽寶月彈桃源春曉

何年鑿源開迷茫桃花雨片吹紅香煙消遠浦生微陽
漁舟誤行溪水長溪回岸轉山隙光疑有絳闕仙人房

居民爭出羅酒漿花間笑語音琅琅抱琴釋子眉髮蒼
響泉韻磬鳴長廊能談往事悲孟嘗昔時臺治今耕桑
又如勇士赴敵場坐令遊子思故鄉清猿抱木號鴻荒
孤吟劃見丹鳳翔曲終待月西南廂重調十指初不忙
如見古畫秦衣裳春天百鳥爭頡頏桃源歸來今已忘
彈到落花空斷腸

寅陂行

安成西有寅陂溉田萬二千畝廢久

官失其籍大姓專之陂傍之田歲比不登邑

丞趙君搜訪耆老盡得古跡浚港築堤躬視
阡陌灌注先後各有繩約是歲紹興十三年
適大旱而寅陂田萬二千畝苗獨不槁民頌
歌之國家方下勸農之詔法有農田水利實
丞職也然緣是而偽自增飾以蒙褒顯者世
不為怪由是水利為虛名今寅陂功績崇崛
丞不肯自言部使者終不及省察某出城別
君東門外逢寅陂之民塞路涕泣言此為敘

其事作寅陂行紹興癸亥十月望日書

安成城頭烏夜宿啼烏未起雞登木傾村入城來送丞
馬首摩肩袂相屬但覩龐眉不識名何事老翁出山谷
老翁持酒前致詞家住西村大江曲大江兩岸皆腴田
古有寅陂置官屬自從陂廢田亦荒官中無人開舊瀆
丞沿故道堰橫流陂傍秔稻年年熟今年雖旱翁不憂
田頭已打新春穀誰云此陂會當復老父曾聞兩黃鵠
嗟哉如君職不荒躬行阡陌勸農桑監司項背只相望

風謠滿路胡不聽胡不聽寅陂行

題羅疇老家明妃辭漢圖

明妃辭漢出宮門
豐容靚飾朝至尊
至尊左右皆動色
明妃欲語復吞咽
三千娥眉塞天閭
帝獨不識王昭君
顧影徘徊復良久
尚冀君王一回首
當時自倚絕世姿
不將賂結毛延壽
可憐朱網畫香車
却來遠嫁呼韓邪
不如歸州舊村女
三幅羅裙兩髻丫
陌上花開大堤暖
細雨春風歸緩緩
寧從禁籞落胡沙
長路漫漫碧雲斷

忽看漢月臨羶裘淚濕彈絲錦臂鞦龍眠會作無聲句
寫得當時一段愁

同陳思忠訪洪覺範

尋春反向僧房卧無乃行藏與時左起來刮目覽新詩
花壓闌干夢初破黃葉丹楓屬興深吁然莫測楚人心
惠休島可沒已久二百年來無此音我氣未衰詞頗弱
欲借席前籌一着終朝巖下不逢人苔色應嗔馬蹄削

送李亭仲赴荆南辟

少年膽氣橫秋煙腰間櫛具森龍泉出門萬里探虎穴
錦帶雕鞍明積雪洞庭木葉飛霜風將軍兼旄西擊戎
旌旗戈甲照湖海櫓槍欲滅胡天空須君磨盾作露布
挿羽來奏明光宮

麗人行

讀大業拾遺作

桃葉山前宮漏遲宮人傍輦持花枝君王喜憑絳仙立
殿脚爭畫雙長眉欲把琵琶彈出塞結綺臨春時事改
井邊忽見張麗華忍聽後庭歌一再

早行

羣雞鼓翼天欲光井上梧桐生微涼殘星爛爛或出沒
初日淡淡開青蒼楚妃臺邊曉雲碧伏波廟前秋草黃
騷人辛苦拾何物沅有芷兮今已香

和韻胡敦實少年行

酒酣坐待東方高臂膺走逐城南豪彎弓射殺白額虎
醉騎歸馬雪花毛日暮黃雲動天色易水迷魂招不得
莫學并州遊俠兒徒費黃金飾韉勒

題劉端禮步芳橋

橋上畫欄低壓水青龍影落芙蓉底欲渡芙蓉望翠微
波面紅雲映屐齒洛浦清流古有神羅襪凌波生暗塵
東昏戲作錦地茵金蓮襯步如花人而今此事墮渺莽
但有荷花開蕩漾試穿芒屨踏風煙安用紫絲連步障

送向豐之

君家梁苑妙人物初來封胡咸勃萃子今二十能綴文
詩如陣馬雄馳突此去荆湖道路長要吟秋水動三湘

歸時蕉葉應黃落
騰拾騷人春草香

過劉美中新居

亂碧峰頭水拍堤
白沙寒竹淨柴扉
晨光破霧千山出
絕壁盤雲一雁飛
窗外煙霞舒錦綺
坐中談笑落珠璣
江邊野老逢人說
待看追烽入翠微

再次前韻

湘水清如碧玉環
湘妃淚染竹痕斑
此時遊宦非高志
何日抱琴歸故山
雁塔共題雙闕際
馬蹄同下五雲間

今朝顓頊荆湖外却望烟霄歎未還

再過東岡

物色江寒楓葉凋江邊微雨暮蕭蕭
白沙翠竹舊行路碧水朱欄新渡橋
畫室當時避征戰十年閒事付漁樵
如今傑屋明人眼一笑端能覆酒瓢

別葛德裕主簿

官冷身閒簿領稀時從物外赴襟期
憑君少緩青絲鞵為我聊傾碧玉卮
野寺石泉秋煮茗松窓雪屋夜論詩

懸知別後東風近先寄寒梅第一枝

和葛德裕別後用舊韻見寄

阿吉德裕子也

渝川咫尺杳如期雞黍猶堪勅婦炊
旋滴銀槽將進酒細傾金屈倒垂危
閒為洛下諸生詠突過黃初數子詩
阿吉想能騎竹馬鳳雛低映碧梧枝

題郭秀才釣亭

野濶江寒一雁飛碧蘆花老鰕魚肥
遶欄綠水秋初淨滿棹白蘋人未歸
醉任狂風揭茅屋卧聽殘雪打蓑衣

他年欲訪沙頭路會自携竿扣竹扉

次韻江正邦

盧溪春水欲平堤滿徑蓬蒿竹掩扉
齋館靜無塵土雜盤飧喜有藥苗肥
君尋甘露峰前住人似山陰雪夜歸
江海未應終寂寞鶴書將下釣璜磯

正邦聞王師來駐辭歸禾山次韻以別

潘才如海渺無堤肯顧衡茆竹裏扉
閒釣一溪春水綠尚容三寸白魚肥
忽傳銅虎天邊下共探驪珠夜半歸

此去煙塵猶未靜何時馬跡破苔磯

送李成叔歸峽江兼簡蕭懋德

平生未見嵇中散野鶴軒昂識季昆江表今無耆舊在
中郎尚有典刑存螺川汗灸書千卷玉澗船歸酒一樽
獨羨冰清蕭處士通家能入李膺門

春日橫山堂有懷謝直夫用前韻奉寄

解道澄江元有聲東山出處更關情高吟正憶西堂夢
妙語仍逢春草生沙尾斷蓬垂釣遠峰頭晚日落船明

不將軍騎驚猿鶴巖谷猶傳此段清

次韻黃元授見訪

中興人物起紛紛應有奇才合致君
仰視孰為真漢相
夜行何識故將軍
且騎駿馬天邊路
莫話高樓日暮雲
年少功名方入手
勒移休動北山文

次韻胡觀光長慶寺早起

曉天樓殿倚空虛
尚見星辰落落踈
鵲動高林人起後
馬嘶殘月客行初
偶來作尉聊驅盜
豈謂論功得謗書

但使一方無犬吠即看黃紙下新除

送胡邦衡之新州貶所

囊封初上九重關是日清都虎豹閒
百辟動容觀奏牘幾人回首愧朝班
名高北斗星辰上身墮南州瘴海間
不待他年公議出漢廷行召賈生還

其二

大廈元非一木支身將獨力柱傾危
癡兒不了公家事男子要為天下奇
當日姦諛皆膽落平生忠義只心知

端能飽喫新州飯在處江山足護持

和曹溫如都監惠詩

兩脚虛隨匹馬塵江湖歲晚始謀身
籬邊日醉陶元亮窗外夜呼祁孔賓
倒著敝衣迎好客急搜奇句發陽春
阿瞞豈但能橫槊文彩風流世有人

二月二日出郊

日頭欲出未出時霧失江城雨脚微
天忽作晴山捲幔雲猶含態石披衣
煙村南北黃鸝語麥隴高低紫燕飛

誰似田家知此樂呼兒吹笛跨牛歸

從叔君冕見訪山間自云平生躬耕釣無求于

人中有至樂令某作詩寫其蕭散之狀為賦

此篇

青鞵布襪綠簑衣滿目秋江白鳥飛小楫扁舟乘興出
斜風細雨釣魚歸有間茆屋臨蒼巘尋箇樵夫上翠微
閒趣牧童吹短笛倒騎牛背入柴扉

和劉端禮避地初歸見訪

庭前喜鵲亂棲鴉知有隣翁酒易賒老瓦盆隨田舍飲
半溪雲屬野人家莫將棘手迎西日來倚危欄詠落霞
無奈醉歸燈火亂僕夫爭路向江沙

和裴主簿九日

欲上高高嶺路微疎林蔽日尚堪依楓江水冷天初靜
桐井霜乾葉亂飛籬下採花人獨秀山頭落帽客何稀
金壺倒盡重沽酒莫惜朝來更典衣

送頓子還廬陵

東歸未辦武陵舟送汝翻成一段愁雪點敝裘騎瘦馬
春寒幾日到荊州湖山天濶洞庭野吳楚月明黃鶴樓
莫苦回瞻白雲嶺是行聊學子長遊

次韻楊廷秀求近詩

聞說學詩如學仙怪來詩思渺無邊自憐猶裹癡人骨
豈意妄得麻姑鞭曾似千軍初入陣清于三峽夜流泉
只今老鈍無新語楓落吳江恐誤傳

楊文發自長沙相別忽來權邑惠詩次其韻

公來

權邑官妓
逃亡略盡

湘水東邊喚渡舟，湘天欲暮使人愁。
豈期陶令來為縣，應念龐公不入州。
索我題詩今老矣，看君下筆幾時休。
論文把酒誠堪樂，莫嘆樽前欠狄秋。

和劉喬卿雪詩

紫極真人吹
簫雪降則止

柴門忽啓玉為闌，疑是新移海上山。
野寺僧居銀窟裏，廣寒宮在月明間。
老農擊鼓迎豐歲，紫極吹簫近帝寰。
臘後東風將解凍，已看峰頂露孱顏。

中夜起坐惜春亭月照醑醑清香郁然因成四

韻

袖手歸來避世塵
醑醑對坐惜餘春
靚粧不入市廛眼
幽韻只應丘壑人
醉喚江梅君益友
力移亭竹我比隣
天公著意憐詩客
月色西窗一夜新

謁魏彥成郎中

病夫投老入城闌
到處逢人說使君
豈料騎驢衝大尹
政須扛鼎識奇文
池生春草何曾夢
楓落吳江誤所聞

更願兼收湖海士當令冀北馬空羣

王主簿清暑閣

襌襪趨程作熱官何如避暑得清安輕陰畫出三湘境
爽氣能為六月寒自有薰風生屋角不須纖手捧冰盤
欄干半倚紅塵外卧聽江聲瀉碧湍

次韻常德府葛倅見寄

武陵旌節控湘西通守仍兼把一麾玉帳靜談千里月
銅符遙鎮五溪夷漂流欲識荊州面飢渴正如桑下兒

仰止門牆訴羈旅窮愁那復有佳詞

贈李子安

窮居未有四立壁負郭兼無二頃田擬劖雲根結茆屋
不知誰贈買山錢

和鄭元清同遊殷仲堪讀書臺

晉國衣冠掃地空漁歌長在水雲中倚欄欲問興亡事
木末瑠璃墜曉風

次韻盧元贊江亭即事

春盡江頭日已低
半天垂柳拂雲齊
流鶯向晚渾無賴
隔水飛來枝上啼

其二

江水磨銅鑑面寒
釣魚人在蓼花灣
雲開貪看新月上
不覺小舟流下灘

次韻劉惠直梅花

雪壓寒梢玉作容
嶺頭相見又東風
人間欲問春消息
半在竹橋溪影中

金夕月八
卷一百九十九
夜郎歸日答葛令惠詩

七載投荒萬里餘
交游半作曉星疎
門前梅柳換新葉
忽得故人相問書

贈寫真胡生

誤着儒衣到骨窮
兒童拍手笑衰翁
釣魚艇子今無恙
置我五湖煙雨中

謁僧惠端不遇

僧扉深倚碧巖隈
何處看雲久未回
日暮鳴鐘應不語

嗔人馬跡浣蒼苔

和答邦直

惠愛如蘭正吐芽
芳風吹落幾千家
明年催直金鑾殿
龍口飄香看百花

和劉元弼見招

玉壺沽酒挈青絲
及取春風花發時
便把一樽留客醉
莫教紅雨洗殘枝

步芳園

密栽桃李礙車輪
柳下風微不動塵
已辦尋春雙蠟屐
飛花滿地草如茵

茉莉花

纖雲捲盡日西流
人在瑤池宴未休
王母欲歸香滿路
曉風吹下玉搔頭

石倉歷代詩選卷一百九十九

欽定四庫全書

石倉歷代詩選卷二百

明 曹學佺 編

宋詩七十七

沈與求

次韻劉殿院贈錢圃翁

平生丘壑心餘事不掛目藜杖南山來要使富幽矚異
哉小玲瓏蟠峙蒼弁腹脩藤結懸崖飛溜響空曲伏石

狀卧虎騰拏雜奔鹿呀然牙吞吐側路劣容足拂拭古
薛紋字刻翳新綠標榜玲瓏名竒怪殆天屬捫蘿上絕
頂坦坦類平陸俯首瞰來蹤穹然在幽谷傳聞昔逋客
誅茆此營屋清魂不可招千載想遺躅我思造物巧妙
供幽人祿揮斤役山祇斲此一拳玉雲窗與霧閣一一
相亘屬豈無部曲衆猿鶴即更僕豈無節旄貴松檜自
張燾此事久棄置蛛絲網巖麓翩翩佳公子心韻古不
俗駕言脫華簪茲馬卜幽築終日面巔岼世故豈容觸

指點空洞姿喜氣政堪掬挾策校昔遊健步念須續亦
有招隱詩薄暮不可讀

臘月二十六夜大雪投曉霽色恍然鳥語啁啾
更有春意感而賦之

黃昏雪打窗夜雨破幽夢晨光逗簷花霽色恍池凍老
木驚向榮好鳥發微哢草根露纖芒蟲聲試羣哄空畦
土勻酥側澗泉流湏臘盡殺氣衰春歸生理共人情自
多端天意皆曲中懸知造物公未厭萌區衆艱難重時

節俯仰疲迎送心閒數造化骨寒遭鬼弄那驚梅柳新
但飽藜藿供行須過田家泥飲空社甕

讀成士穀詩卷和其書事一章

長年賦子虛狗監絕同里枯水聊自酬博此一笑喜副
墨粲我前頓使百廢起朱絃渺遺音慎勿娛俗耳論交
儻自今相從期暮齒

夜坐感事

沈沈夜氣歸虛堂閉深寂孤燈炮餘花寒雷韻殘滴醞

釀萬斛愁感慨一人敵何當棄短檠陰山叱鳴鏑

夜書山驛

天寒夜向闌月出山更靜風露搖青空萬象光耿耿啼
蜚泣幽草賓鴻度前嶺歸來坐孤窗松竹舞清影

鄭維心用張仲宗韻見贈復次其韻奉酬

胸中飽世故了了分白黑十年客異縣中夜夢鄉國買
鄰枕寒溪此計吾猶及不如早移文徑效山庭勒

夾竹桃花

搖搖兒女花挺挺君子操一見適相逢綢繆結深好妾
容似桃李郎心如竹枝桃花有時謝竹枝無時衰春園
灼灼自顏色願言歲晚長相隨

蠶

吳桑成綠陰吳蠶盈翠箔闔門障風雨荒祠動村落千
絲為衣被一繭自纏縛殺身以成仁此計殊不惡

夏日書事

洗竹明新牖疏泉理廢池破磨炊玉粒釣影鱸銀絲假

寐拋書帙蠲煩泥酒卮空餘八角扇懶惰不能持

到吳

三載故鄉別歸帆恰到吳食寒新火換天濶斷雲孤酒
市仍依岸漁村遠帶湖碧山千萬疊翻憶夢崎嶇

旦日趨府

紫簫吹夢斷起視斗闌干瘦馬踏殘月單衣中薄寒錦
囊那復佩革帶頓成寬浪逐官曹底趨樞敢自安

次韻律兄持節燕山且調兩河兵賦喜而作詩

伯也吾宗秀心期萬里侯燕民方築郡漢使果鳴騶更
借牙籌計聊寬玉座憂平生揮翰手此意莫淹留

其二

中年情緒惡遠別信音疎聞道陰山路貪迎使者車騎
羊厭鳴鏑佩犢欲扶鋤願上螭頭奏煩苛一切除

倦夜

獨坐苦無賴開軒懷抱空徘徊簾上月漸灑竹間風清
影迷篝火哀音咽砌蟲怪來寒徹骨霜氣已冥濛

送別

老覺交情重貧知世路高相看心已折此別夢應勞未
用脂長較須聽詠大刀平生故人意能費幾緋袍

秉元以按田至村落有詩次其韻

竹戶連村閉官河此榜舟蒿萊半殘壟風露溢清愁試
為歌田畯那知饑蓐收老盆如見領應作小遲留

舟行即事

逗帆風借力入坐水浮光村落知多少郵亭自短長跳

魚吹暗浪浴鷺耿殘陽又是吾廬遠相看思渺茫

舟過北塘

嫋嫋輕颺動娟娟佳月生岸回雙樹暗村遠一燈明過
雁參差影跳魚撥刺聲傳橈且勿去吾意不勝清

舟次吳松江

棹發鱸鄉晚頻經桂子秋嬾投青玉案政敝黑貂裘水
落喧漁市雲微辨橘洲五湖煙浪靜誰復泛扁舟

秋懷

庭柯脫翳葉歸翼斷經過水檻清漁罟風櫓響藥羅傲
霜荷柄少團露橘叢多秋色遂如此愁城今幾何

別羣從

十年勞遠夢今日又征鞍雨入花梢困風生麥浪寒飄
零逢酒怯老大別家難去矣功名事終須抱鏡看

得家書

國步猶艱棘不堪頻問家霜毛失翠葆蒿目亂玄花孤
客知時節殊方度歲華干戈就休息歸理邵平瓜

於潛道中

首路潛溪驛雞聲欲暗天
籃輿衝宿霧棧閣寄層巔
高下林端屋橫斜石罅田
野泉隨處有草木盡蒼然

新城道中

馬蹄隨意到回首隔南岡
日落鳥猶語春歸花自香
殘紅媚幽谷新綠漲回塘
假榻知何地昏鐘出上方

次韻避寇

窮途厭遷次歲晚惜分携
茆舍荒村北柴門曲港西
雞

豚醵同社桃李舊成谿那得干戈定浮家著兩溪

其二

宦遊成屢卻戎壘悵頻遭聞詔趨吳會經途事董逃心
期紓國難力欲挽人豪漂泊多危涕真成失木獠

維心過邵子非漢亭夜話有傷時感舊之作索

余次韻

官儀全復漢盟會競尊周郊野多戎壘衣冠半客遊地
偏朋舊鮮人老歲時道莫厭經過數相看又麥秋

其二

朝廷策數馬冠盜谷量牛世亂思奇畫身閒喜勝流鵝
驚霄漢侶鳬雁稻梁謀得趣皆為達誰為不繫舟

劉希顏持節按縣招維心舟中小酌次維心韻
大舳浮溪曲華旌暎道周勞農纔徹警問俗偶成遊王
事今云棘官稱古號道正須哀疾苦輒莫詫防秋

其二

故國真如寄餘生宛若浮巢鳩不護鵲池鳳肯容鷺老

木低春水孤花帶晚洲
杯行應酌我知復念幽憂

曉過鄰村

推枕夢初斷
籃輿踏露行
歲登人意樂
風急雁行驚
曲澗哀湍瀉
危橋獨木橫
清霜莫欺客
雲日自晶明

即事

竹樹參差合
溪流半隱扉
雨昏鳩婦鬧
風急雁奴歸
策杖循沙步
褰裳到石磯
遊魚吾共樂
身世自依違

觀網魚

暗雨垂垂梅欲黃
春山吐源春漲狂
雪鱗賴尾沂流上
吹濤噴浪能奔忙
魚師布網名白大
萬目井井連重網
聯艘絕流勢甚武
遮羅初若無留藏
大魚已得小魚棄
要使遺育充陂塘
鰓鰣安用誤回
避蝦蟹亦復虛跳
梁
寧知不比綸索手
欲以巧餌空滄浪

何子楚為范明倫賦九疑石石吾不及見也讀
詩可以知其巔屹秀峙之狀吾累卞峰石為
小寒林興寄不淺用其韻并及之

我并千峰倚天碧上有脩筠材可遂月明三弄面巉巖
驚起哀猿啼峭壁兒童斲石攢青瑤寒林蕭蕭吹墮樵
坐令結習落幽夢芒屨竹杖歸路遙覺來隻影徒相守
哦子清詩筆如口眼中何必小玲瓏仿佛九疑當戶牖
神丹已失大江濤誰與安期追後塵分天隔日不可到
使我目斷蒼梧雲

劉行簡見借詩稿以長句歸之

文章偏忌聲名早富貴政須門第好了知二物不相關

風月膏梁兼者少劉郎天韻真不凡飛騰宜在蓬萊島
年來窮愁已到骨只有珠璣落殘稿紛紛餘子何能追
定向詩壇分六燾造物小兒亦薄相浪付繁華給揮掃
却令徑坐詩人窮只與清冷消熱惱向來狗監非國邑
渴盡文園尚傭保九原千古忽可作如君自是不枯槁
茆齋夜誦誰得聞咄咄空能訴穹昊請君更作昇天行
勿使貧胡彊知寶

次韻何子楚食櫻桃

輕衫駿馬飛彈丸上林花開紛繡園御厨賜笋未解籜
山櫻亦復登金盤宗廟薦新勤玉路凡果紛紛不論數
風清日美雨絲收朱實烘春燃綠樹筠籠採擷價萬錢
北人羊酪雅所便自從燕罷曲江曲五湖十載身回旋
已作孤蓬任流轉萬顆徒勞野人獻故無清夢大明宮
醉倚酡顏浮玉盃

次韻黃子虛同飲葛次顏家釀玉友

先生早年忘掃白懶飯青精借顏色獨餘驪伯為友朋

熟不暇斲巾自漑何須引泉連百井飲若長虹太豪猛
細斟玉筋滑無聲酌我應憐官獨冷奇篇更寫陟釐黃
逼人心地生清涼了知二事盡家法眼饒徑索銀瓶嘗
我老華池少滋液年來愛酒如偷蜜陶然一醉樂未央
此外要知俱長物相期徑造君勿違坐得名勝從忘歸
公侯似聞勅設醴穆生政恐同分携

寧國道中

山石犖确行路難山風蕭蕭吹早寒十步九歇僕馬瘁

兔蹊鳥道窮躋攀崖谷空籠瀑泉走碎玉零亂飛前灘
石堤捍水幾百級落處疑有蛟龍盤兩山之間開缺畝
石罅著鋤那得寬前村後村煙火冷土墻茆蓋常掩闕
我行不知記近遠宦遊歲晚良自歎豈如家家一飽外
雞豚社酒相追歡那知亦有簡書畏里胥剥啄驚胸顏
溪上見梅

晴溪漲淥如陰苔晴日挿影相低回畫船疊鼓順流下
波光浩蕩征帆開灘縈岸繚柁牙轉水石相激如奔雷

須臾已復過絕壁歸路漸近嚴陵臺山重溪複境彌迥
暗香忽自空中來日斜正見叢棘外炯炯踈片飄寒梅
槎牙一種獨愁絕含情不語明巖隈凌波疑是水仙出
縞衣素質行徘徊下窺深淺一笑粲坐使凡卉俱塵埃
山谷之儒已臞甚龜腸鶴骨世所咤相逢頓覺百憂釋
不嫁春風誰與媒舟行易遠空回首角聲吹夢心悠哉

次韻葛魯鄉送示近作

八騶畫屏如縈策微步招尋老賓客離離草色亂溝塍

脚底春風隨蠟屐
蟄龍昨夜起洄潭
忽雷閃電飛千巖
朝來遺珠落懷袖
復見國風歌二南
公洗膏肓砭傳癖
詞伯儒宗早揚歷
詩成聊復貯錦囊
副在久應藏石室
只今漂泊客煙村
高吟七字哀王孫
有如此言公不食
東山那得留安石

其二

君侯胸次多籌策
歲晚翻為江海客
小隱方營一把茆
幽尋定費幾兩屐
公心落月印寒潭
出濟巨川歸築巖

金匱要略卷之四
追還正始遊戲事聊為風騷作指南我有幽憂如酒癖
起誦君詩春寂歷天公卜取氣凌雲神物護持光滿室
老矣懷歸葑上村倚公佳句譜桐孫須公拯危紓肝食
快寫車攻刊藥石

攝尉歸安呈江嘉

無地誅鋤一束茆清吟端作反離騷奔波且復同香尉
蕭散還須似馬曹名下吹噓初定價暗中募索便矜豪
文章論世寧論晚肯慕羣飛輒仰高

舟過荻塘

野航春入荻芽塘
遠意相傳接渺茫
落日一竿桃葉浪
薰風十里藕花香
河回遽失青山曲
菱老難容碧草芳
村北村南歌自答
懸知歲事到金穰

過徐氏郊居

林梢眇眇墮斜暉
剥啄還來扣隱扉
門巷劣容居士屨
塵埃不到野人衣
恰當夜甑黃粱熟
盛供春山紫蕨肥
侍坐無人只山月
兩翁相對自忘機

清明

杏火燒空潑眼明
遊人蕩槳綠蕪城
山歌慣習吳歛調
水戲終含楚些聲
草滿池塘春漲淺
燕歸簾幕午風輕
踏青舊約誰能問
已喜年來粥有餠

報中有盛年休官者感而賦詩

中都如海士如鱗
乘雁雙鳬亦見馴
林下已無長往客
江頭誰伴獨醒人
因循儻使能成事
彊健何須便乞身
但喜高風激頽俗
要令鐘漏一番新

次韻宏父喜雨

黃壠初看卷麥禾老農還復厭晴多
四郊庠尾開新瀆一雨苗根長舊科
已發政聲歸召杜更驚詩律鬪陰何
王孫欲識田家樂水亂溝塍涉可過

石壁寺

山縈細路走脩蛇峭壁連雲只薜花
木末忽看幡影亂馬頭初見殿陰斜
迴廊迤迤穿危嶠側澗娟娟露淺沙
秀色可餐吾事辦粥魚茶板莫相夸

秋日閒居

茆屋秋風斗破除
蕭騷渾似浣溪居
青山侍坐從吾好
黃帽龍頭與俗踈
賴有園官能送菜
可無溪友解留魚
從今輒莫慚枵腹
一飽須煩挿架書

喜次律兄見過

大編軻輅許暫留
一樽相屬話牢愁
封胡羯末名終在
許史金張迹浪投
遵陸漸看鴻雁集
在原當紀鵲鴿求
他年會有相從樂
泛宅浮家萬事休

用子虛韻和呈駿發次顏

十里笙簫沸市樓已占風物兩優游
人從月窟開青嶂燈挾星河映碧流
曲席深杯成徑醉長廊古寺溢清愁
暗中我亦知公在彊對蘭膏為舉眸

即事

造物勞人亦惜哉又驅疲馬上崔嵬
徑從野店初嘗筍行盡江村始見梅
千里短書先夢寐半生多難足風埃
桔槔俯仰成何事已念漁蓑歸去來

邵子非謂余有天台之行見貽以詩因次其韻
巉巉老氣鬱青霞過我依然醉帽斜為說驚魂招楚些
忍聞悲曲動胡笳扁舟犯雪來何許健筆凌雲語益嘉
莫笑海山風引去要尋源上問桃花

小雨

小雨廉纖未肯晴勒回花信待清明冷官何預芳菲事
空聽春禽作意鳴

雲隱軒

仙去遺蹤亦謾留羽旗那復肯來遊欲知洞府煙霞邃
漠漠蒼崖面橘洲

新春書事

早歲驚逢上苑春蹇驢朝踏落花塵只今懶問芳菲事
柳眼相看也笑人

有懷中山

可奈風埃老客遊故山歸思日悠悠軒裳結裹非吾事
野性從來在一丘

其二

冠卷塵埃亦謾彈
勒移終復愧家山
他年猿鶴應相笑
勸羽卑飛久未還

申應時以圖尋山圖所載湖之西溪也為作絕句

王維買宅先成畫
申子尋山亦載圖
他日真能營小築
此山佳處着儂無

夜坐

娟娟微月小窗東竹裏寒聲嘯夕風孤客坐來驚歲晚
推愁不去酒杯空

其二

虛堂夜寂自神清更僕無端倦觸屏多謝短檠隨我老
更溫檀火校黃庭

月波樓

突兀晴樓壓郡城樓前波面縠紋生何人合作佳從事
來伴胡牀看月明

會景亭

柳株高下隔桃溪萬頃煙波似漾陂畫手無人貌平遠
小亭風冷立移時

次曾宏父韻

小雨經旬戶不開隔牆青子滿江梅幽禽葉底如相識
睥睨空庭欲下來

其二

未用欣然念可人世間那有白頭新出門更復推愁麥

笑殺扶風井大春

曾宏父將往雪川見內相葉公以詩為別次其
韻以自見

腸斷故園春到時
澆花日日遶芳蹊
而今夢逐東風去
小榼深杯手自携

其二

兩溪以南無數山
興來徑造無時闌
空餘日蠟幾兩屐
日暮雲深天小寒

其三

隔溪花柳自無賴
煙淡風微惱殺人
走向西家覓酒伴
芒屨竹杖去尋春

其四

牆根啁啾百鳥鬧
最愛雨鳩來喚晴
日永春閒深院落
渠能便當管絃聲

其五

楊舲送子下苔雪
繫纜

多柳株十載風埃老行客

不知鷗鳥記人無

吳江阻雨過豁然閣次周廉彥韻

花鴨呼羣自拍浮何人簑笠在孤舟
半生已負江湖約不為輕行肯暫留

其二

濛濛小雨麥秋天江上人家欲暮煙
行客未能忘勝處繫船相伴白鷗眠

次韻錢德初九日旅懷

金步四八八
卷二百
西風江面荻花秋
鱸玉頻年念昔遊
客帽只今無地落
黃花滿眼謾供愁

其二

登高虛欲夸能賦
樂事何曾副賞心
斜日孤雲兩愁絕
一觴聊為盍朋簪

其三

濁醪自稱和山藥
小令新能坼水花
況有阿戎供細雨
豈知秋思滿天涯

過嘉禾野塘

木末孤煙起夕炊茅簷直下釣魚磯
蒼茫遠水連天碧一葉短篷何處歸

次韻院中

芳樽相屬語黃昏密雪飄零正滿門
記得江橋回馬處冷香應斷玉梅魂

其二

要知春色到池塘深院無人午夢長
已覺此身便靜樂

自溫檀火炷爐香

石壁寺山房即事

雲根斲翠接山椒
小築初營一束茆
未放野泉縈曲磴
旋移寒綠引春梢

其二

望斷南崗遠水通
客檣來往酒旗風
畫橋依約垂楊外
映帶殘霞一抹紅

過卞山次韻朱仰止澗亭

曲澗潺潺隱石堤
玉蚪雙引戲晴漪
相思後夜添清絕
木落山空月半規

其二

環珮琤琤落斷崖
水清石瘦沒平沙
幽人散策經過地
草閣柴扉趁水斜

即事

卯酒賸澆胷礪礪
晨梳聊理髮鬅鬢
方牀自岸烏巾坐
欲校黃庭懶未能

過竹西

百折清灣抱野田
竹西風物故依然
歸牛更背斜陽去
牧笛一聲吹暮天

瓜步

呼聲漸逐潮頭遠
帆影低隨日脚斜
已喜扁舟近瓜步
江鷗無數立寒沙

觀瓊花

千里隋河走濁流
檣烏東下指迷樓
春風簾幕今何在

只有瓊花伴客愁

卽事和卓彥翼

矇矓曉日上簾旌
簾外幽禽作意鳴
呼斷故鄉千里夢
起來搔首問歸程

次桐廬

泱泱溪流不滿灘
獨憐舟子上風灣
日斜指點西村渡
竹戶茆牆趁碧山

其二

吏鞅縈人未許閒當遊聊復到春山
倡條冶葉無風味
賴有寒梅醒病顏

千秋嶺

山河四塞限中原籬落而今不復存
豺虎晝行何日息
但餘征戍滿荒村

月下獨步

娟娟微月小庭西月下幽人影自隨
賴有寒梅伴愁絕
一枝清豔耿疎籬

溪亭夜坐

波面搖風暑氣微
禿巾來坐釣魚磯
相看月墮行人盡
只有流螢上下飛



石倉歷代詩選卷二百